

24. april 2017

Siunnersuut uunga: Atornerluineq pillugu Inatsisartut Inatsisaat nr. xx xx. 2017-imeersoq.
(Peqqissutsimut Naalakkersuisoq)

Naalakkersuisut inatsisissatut siunnersuutaannut Siumumiik imaattumik oqaaseqassaagut.

Siumumi pingaartitaraarput inuiaqatigiit peqqissut sulinitSIGUT pilersissallugit, tamannalu suliassaq annertuvoq suleqatigiinnitsigulli inuiaqatigiillu peqatiginerisigut angusinnaallugu Siumumit upperiuaannarparput, matumanilu inatsissakkut atornerluinermik inuit atuisuulersimasut katsorsarneqartarnerisa ingerlajualersimasup nukittorsarneqarnissaa siunertarineqartoq Siumumit maluginiarparput ilalersorlugulu.

Siullermilli erseqqissarusunnarpoq inuiaqatigiinni ilaqutariit inuillu peqqissut ingerlalluartullu amerlasoorpassuit tulluusimaarutissaasut maligassaasullu innuttaaqatigisavut annertuumik nersugassaammata.

Matumunngalu inatsisissamut Naalakkersuisut saqqummiussaanni inuiaqatigiinni inuit inersimasut affaasa missaat nalunaarusiami atornerluisuusut imaluunniit atornerluinerlernissamut qanittuararsuusut oqariartuutigineqarlutik. Tamanna allangortinneqanngippat siunissamut annertuumik ernumanarpoq, pingaartumik nunamik namminiilivinnissamik sulinerup aallartisaleruttorfiani, inuiaqatigiillu tamatta pisariaqartinneqarnitsinnik Naalakkersuisut oqariartornerisa killiffianni taama ajornartorsiut annertutigimmat.

Neriuutigisinnaasarpulli ukiorpaalussuannortuni katsorsaanerup inuiaqatigiinni ingerlanneqarnerani misilittagaqarlersimanerup sakkussanik pitsaasunik peqalersimanerput atorluarneqarneratigut atornerluisunngortartut inuunermut qaamasumut isertinneqarnissaannut aqquataalluaqqinnissaat atorluarneqarnissaallu Siumumiit kissaatigeaarput.

Siumumiillu atornerluisunngoreersimasut annertuumillu suliassat inatsisissami pineqartut pillugit pitsaasumik angusaqarfiunissaa neriuuteqarfigaarput.

Inatsisissami siusinaarluni iliuseqarnissamut piginnaatitsinerup ersarinnerulersinneqarnissaa pisariaqassaaq, siunissaq isigissagaanni inuit atornerluisunngorsimasut suliariniarnerat taamaattu-aannassanngippat siusinaartumik ikiuisinnaanermik suliniarnerput ullumikkornit annertunerusariaqarpoq pingaaruteqartorujussuaq.

Inatsisissatut siunnersuummi §7-mi imm.2-p ataani siulersuisunik pilersitsisoqarnissaani kommuneet akuutinneqarsinnaanersut aammalu katsorsaasut ilaasinnaanersut apeqqutigerusupparput.

§16-imilu inuit katsorsarneqarnissaannik periuserineqarsinnaasut apuussisinnaasut allattorneqarsimaneranni, qanigisaasut atornerluinermik eqqugaaqataasarnernannik nalaataqartartut apuussisinaanissaannut periarfissaqarnissaat Siumumit pingaartutut isigalugu ilanngunneqarsinnaanersoq nalilersoqquarput.

Kapitali 6, §24 katsorsaavinni sulisorineqartussat killiliussat annertuumik pituttuinnginnissaat isumaliutigeqquarput, tassami piumasaqaataasut malinnagit inuit annertuumik atornerluisuusimallutik qaqisimasut katsorsarneqartunut annertuumik tunniussassaqaarsinnaanerat eqqumaffigineqarpat aamma annertuumik iluaqutitassaartoq takusinnaagatsigu. Siumumit pineqartut periarfissaqaarsinnaanerat mattutinnginnissaallu maluginiarluaqquarput.

Siumumit inatsisissatut siunnersuut siunissamut sakkussatut pitsaasutut inuiaqatigiinnilu inuit peqqisuullutik aqutissiuunneqarnissaannut atorluarneqalernissaa kissaatigalugu, aappassaaneerneqartinnani Ilaqutariinnermut Peqqissutsimullu Ataatsimiititaliamut peqqissaartumik suliarineqaqqinnissaa innersuussutigaarput.

Karl-Kristian Kruse
Siumut